

*Tarikh dibaca: 24 Mei 2019M / 19 Ramadan 1440H*

# **KHUTBAH JUMAAT**

***Tajuk:***

***“KEAGUNGAN AL-QURAN DAN  
TANGGUNGJAWAB KITA”***

***\*\*\****

***Terbitan:***

***Unit Khutbah***

***Bahagian Pengurusan Masjid***

***JABATAN AGAMA ISLAM SELANGOR***



## “KEAGUNGAN AL-QURAN DAN TANGGUNGJAWAB KITA”

الْحَمْدُ لِلَّهِ الْقَائِلِ: فَإِذَا قَرَأْتَ الْقُرْآنَ فَاسْتَعِذْ بِاللَّهِ مِنْ

الشَّيْطَانِ الرَّجِيمِ<sup>1</sup>

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ  
مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا  
مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا  
أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ  
فَقَدْ فَازَ الْمُتَّقُونَ. قَالَ اللَّهُ تَعَالَى: يَا أَيُّهَا الَّذِينَ ءَامَنُوا  
اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

**Muslimin yang dirahmati Allah sekalian,**

Saya mengingatkan diri saya dan tuan-tuan sekalian agar meningkatkan ketaqwaan kepada Allah SWT dengan terus menerus menjunjung segala titah perintah-Nya dan menjauhi segala larangan-Nya. Semoga dengan itu kita semua diterima sebagai hamba-Nya yang beroleh kejayaan di dunia dan akhirat.

<sup>1</sup> Al-Nahl : 98.



Dalam kesempatan yang sangat berharga ini marilah kita menghayati khutbah yang bertajuk **"KEAGUNGAN AL-QURAN DAN TANGGUNGJAWAB KITA"**

**Hadirin Jumaat yang dirahmati Allah,**

Apabila kita menyebut bulan Ramadan maka yang paling cepat terbayang dalam fikiran kita ialah ibadah puasa. Namun hari ini Khatib ingin berkongsi kefahaman bahawa ada satu perkara besar yang Allah kaitkan dengan bulan yang mulia ini. Perkara tersebut dijelaskan Allah melalui firman-Nya dalam surah Al Baqarah ayat 185:

شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ  
مِّنَ الْهُدَىٰ وَالْفُرْقَانِ

*"(Masa yang diwajibkan kamu berpuasa itu ialah) Bulan Ramadan yang padanya diturunkan al-Quran, ia adalah petunjuk bagi sekalian manusia, dan menjadi keterangan-keterangan yang menjelaskan petunjuk dan perbezaan antara yang benar dan yang salah."*

Ayat ini jelas mengaitkan bahawa bulan Ramadan yang mulia itu adalah bulan al-Quran. Justeru dalam bulan ini para Salaf Al-Saleh (السلف الصالح) melipat gandakan tumpuan terhadap al-Quran sehingga ada riwayat yang menyebutkan bahawa al-Imam Malik dan al-Imam Syafie menangguhkan kelas pengajian mereka sepanjang bulan Ramadan untuk menumpukan perhatian kepada al-Quran.



Justeru hari ini, khatib ingin mengajak hadirin sekalian untuk mendengar sebuah kisah yang dinukilkan oleh al-Imam Al-Baihaqi dalam kitabnya Dalail al-Nubuwwah mengenai keagungan al-Quran:

“Adalah diriwayatkan oleh Yahya ibn Aktham (يحيى بن أكثم) bahawa pada suatu hari Khalifah Al Makmun ibni Harun Al Rasyid (148H-193H) telah mengadakan suatu diskusi ilmiah yang dihadiri oleh para ilmuan dari berbagai bidang. Antara yang hadir dalam majlis tersebut seorang lelaki yang mempunyai penampilan yang menarik; berpakaian putih, kemas dan memakai wangian yang harum. Di sepanjang majlis itu lelaki tersebut banyak bercakap dan memberikan saranan, wawasan dan gagasan yang baik-baik, ini menyebabkan Khalifah tertarik dengan kebijaksanaan lelaki itu. Setelah selesai majlis, Khalifah memanggil lelaki tersebut dan bertanya: Israiliyyun anta? maksudnya adakah kamu beragama Yahudi? Ya! jawab lelaki itu. Kemudian Khalifah mempelawa lelaki itu agar menganut agama Islam dan menawarkan kedudukan tinggi yang layak dengan kebolehannya. Namun lelaki itu menolak tawaran tersebut seraya berkata: itukan agama datuk nenek kami! Tidak mungkin saya meninggalkannya.

Selang setahun daripada peristiwa tersebut lelaki itu datang semula berjumpa khalifah dalam keadaan telah memeluk Islam. Khalifah bertanya apa yang menyebabkan kamu memeluk Islam?, lelaki itu menjelaskan:

“Seperti yang tuan tahu bahawa saya orang yang mahir menulis dengan cantik, saya mengambil kitab Taurat dan saya salin kepada beberapa naskhah dengan membuang dan menokok-tambah apa yang saya fikirkan sesuai. Setelah selesai, saya pun pergi ke biara tempat peribadatan penganut agama Yahudi lalu saya menjual senaskhah kitab itu, ulama’



mereka membeli dengan gembiranya. Selepas itu saya menyalin pula kitab Injil kepada beberapa salinan dan saya menokok tambah apa yang saya fikirkan sesuai seperti apa yang saya lakukan terhadap Taurah, kemudian saya pergi ke Gereja untuk menjual salinan kitab tersebut kepada ulama' mereka, mereka membelinya dengan gembira. Selepas itu saya menyalin al-Quran kepada beberapa salinan dengan menokok tambah apa yang saya fikirkan, kemudian saya pergi kepada sekumpulan ulama' lalu saya ajukan hasil kerja saya yang cantik itu kepada mereka, tetapi setelah mereka dapat mengesan tokok tambah yang saya lakukan mereka enggan membelinya bahkan mereka bangun mencampak dan membakarnya serta mereka memarahi saya hingga hampir saya dibunuh.

Tuan! Disebabkan itulah saya yakin bahawa al-Quran itu sebenarnya adalah kitab yang terpelihara dari Allah, dan inilah sebab yang menjadikan saya meninggalkan agama asal dan saya memeluk agama Islam.

Yahya bin Aktham berkata selepas peristiwa itu saya pergi bertemu Sufyan ibn 'Uyainah seorang tabi' tabi'in dan saya mengisahkan cerita saya tersebut kepada beliau. Sufyan ibn 'Uyainah akur serta membenarkan cerita saya itu, bahkan beliau mengaitkan hal itu dengan apa yang Allah jelaskan di dalam al-Quran tentang perangai jahat orang Yahudi dan Nasrani yang suka menokok tambah kitab Allah yang ada pada mereka. Mengenai al Quran pula Sufyan membacakan Firman Allah dalam surah al Hijr ayat 9:

إِنَّا نَحْنُ نَزَّلْنَا الذِّكْرَ وَإِنَّا لَهُ لَحَافِظُونَ

*"Sesungguhnya Kamilah yang menurunkan al-Quran dan Kamilah yang menjaga dan memeliharanya."*



## Hadirin tetamu Allah yang dirahmati,

Oleh sebab al-Quran itu datangnya dari Allah maka sudah tentu ia merupakan mukjizat yang maha agung. Isi kandungannya tidak terdapat sebarang kesilapan malah sebaliknya kajian demi kajian telah dilakukan oleh cerdik pandai Islam dan bukan Islam yang akhirnya mereka tersimpuh dengan tawadhuknya menemui fakta-fakta yang sangat menakjubkan. Antaranya Dr Muhammad Ahmad Al Ghamrawi yang telah menulis buku *عصر العلم القرآن* (al-Quran di zaman ilmu pengetahuan). Seterusnya seorang Doktor Perubatan berbangsa Perancis: Maurice Bucaille pakar dalam bidang Biologi dan telah menganut agama Islam, beliau banyak menghasilkan karya berkaitan al-Quran dan sains moden. Antara tulisan beliau ialah buku yang bertajuk "Taurat, Bible, Al-Quran dan Sains Moden."

## Muslimin yang dirahmati Allah,

Antara ratusan penemuan yang menakjubkan, yang mengaitkan keagungan al-Quran dan ketepatan fakta yang disebut di dalamnya:

1- Penjelasan mengenai terdapatnya pembahagian air tawar dan air masin dalam satu lautan. Ini telah disebut oleh al-Quran dalam surah al-Furqan ayat 53:

﴿ وَهُوَ الَّذِي مَرَجَ الْبَحْرَيْنِ هَذَا عَذْبٌ فُرَاتٌ وَهَذَا مِلْحٌ أُجَاجٌ وَجَعَلَ بَيْنَهُمَا بَرْزَخًا وَحِجْرًا مَّحْجُورًا ﴾

*"Dan Dia lah Tuhan yang mengalirkan dua laut berdampingan, yang satu tawar lagi dapat menghilangkan dahaga dan yang satu lagi masin lagi*



*pahit, serta Ia menjadikan antara kedua-dua laut itu sempadan dan sekatan yang menyekat percampuran keduanya."*

2- Penemuan mumia Firaun yang mati lemas kerana tenggelam dalam laut merah ketika mengejar Nabi Musa Alaihissalam. Penemuan ini menunjukkan bahawa terdapatnya garam laut merah pada jasad mumia tersebut yang meyakinkan bahawa inilah Firaun yang Allah tenggelamkan dan selamatkan jasadnya. Ini dijelaskan dalam al-Quran surah Yunus ayat 92:

فَالْيَوْمَ نُنَجِّيكَ بِبَدَنِكَ لِتَكُونَ لِمَنْ خَلَقَ آيَةً وَإِنَّ كَثِيرًا  
مِّنَ النَّاسِ عَنَّا أَيْتِنَا لَغَافِلُونَ ﴿٩٢﴾

*"Maka pada hari ini kami biarkan engkau terlepas dengan badanmu yang tidak bernyawa daripada ditelan laut, untuk menjadi tanda bagi orang-orang selepasmu supaya mereka mengambil iktibar. Dan ingatlah sesungguhnya kebanyakan manusia lalai daripada memerhati dan memikirkan tanda-tanda kekuasaan kami."*

### **Hadirin yang dirahmati Allah,**

Setelah kita disirami dengan sedikit kefahaman dan penghayatan tentang keagungan al-Quran maka adalah menjadi tanggungjawab kita seterusnya menjunjung dan memartabatkan al-Quran sesuai dengan kedudukannya. Justeru, Setiap warga Muslim mestilah pandai dan lancar membaca al-Quran. Dewasa ini bagai tiada alasan yang memaafkan orang yang buta al-Quran, kerana sudah banyak kaedah dicipta dan kelas-kelas pengajian diwujudkan untuk memberi bantuan kepada mereka supaya dapat mengatasi kelemahan tersebut. Sesungguhnya kita tidak boleh mengambil



sikap sambil lewa atau acuh tak acuh dalam menghadapi masalah ini. Walaupun telah ketinggalan namun kita hendaklah terus berusaha untuk mengatasinya.

Adalah sangat wajar diambil perhatian bahawa al-Quran mesti dibaca dengan tartil dan menjaga makhraj huruf serta hukum bacaannya dengan betul. Setiap kita mesti berusaha untuk memahami ayat yang dibaca supaya kita dapat menikmati hidayah Allah Taala dan seterusnya melaksanakan segala perintah yang terkandung di dalamnya.

### **Hadirin Jumaat yang dirahmati Allah,**

Menelusuri khutbah hari ini maka beberapa taujihat dan tausiah perlu diambil perhatian:

1. Umat Islam mestilah yakin terhadap keagungan al-Quran sebagai dustur al-hayah atau perlembagaan hidup.
2. Umat Islam mesti yakin bahawa soalan mengenai keimanan, persepsi dan sikap kita terhadap al-Quran akan dipersoalkan didalam kubur.
3. Umat Islam jangan hanya berpuas hati dengan banyak menghafaz dan membaca al-Quran tanpa mematuhi hukum tajwid kerana ia dikira sebagai maghrur atau terpedaya.
4. Umat Islam akan menjadi mundur jika membelakangi al-Quran.





أَعُوذُ بِاللَّهِ مِنَ الشَّيْطَانِ الرَّجِيمِ  
وَقَالَ الرَّسُولُ يَرْبِّ إِنَّ قَوْمِي اتَّخَذُوا هَذَا الْقُرْآنَ مَهْجُورًا ﴿٣٠﴾

"Dan berkatalah Rasul : "Wahai Tuhanku! Sesungguhnya kaumku telah menjadikan al-Quran ini suatu perlembagaan yang ditinggalkan tidak dipakai."

(Surah al-Furqan : 30).

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي  
وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ  
مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ.  
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ  
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ هُوَ  
الْغَفُورُ الرَّحِيمُ.

\*\*\*\*\*



## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ  
لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ  
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ  
وَصَحْبِهِ، وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا  
بَعْدُ، فَيَا عِبَادَ اللَّهِ، اتَّقُوا اللَّهَ، أُوصِيكُمْ وَإِيَّايَ  
بِتَقْوَى اللَّهِ فَقَدْ فَازَ الْمُتَّقُونَ.

وَقَالَ اللَّهُ تَعَالَى : إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ  
يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ وَسَلِّمْ عَلَى سَيِّدِنَا وَمَوْلَانَا مُحَمَّدٍ سَيِّدِ  
الْمُرْسَلِينَ وَارْضَ اللَّهُمَّ عَنْ أَصْحَابِهِ وَقَرَابَتِهِ وَأَزْوَاجِهِ  
وَذُرِّيَّاتِهِ أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ



مُجِيبُ الدَّعَوَاتِ وَيَا قَاضِيَ الْحَاجَاتِ. اللَّهُمَّ أَعِزَّ  
الإِسْلَامَ وَالْمُسْلِمِينَ، وَأَهْلِكَ الْكُفْرَةَ وَالْمُبْتَدِعَةَ  
وَالْمُشْرِكِينَ وَدَمِّرْ أَعْدَاءَكَ أَعْدَاءَ الدِّينِ. وَانصُرْنَا  
عَلَى الْقَوْمِ الْكَافِرِينَ.

اللَّهُمَّ إِنَّا نَسْأَلُكَ وَنَتَوَسَّلُ إِلَيْكَ بِنَبِيِّكَ الْأَمِينِ،  
وَنَسْأَلُكَ بِأَسْمَائِكَ الْحُسْنَى، وَصِفَاتِكَ الْعُظْمَى، أَنْ  
تَحْفَظَ بَعَيْنِ عِنَايَتِكَ الرَّبَّانِيَّةِ، وَبِحِفْظِ وَقَايَتِكَ  
الصَّمَدَانِيَّةِ، جَلَالَهٖ مَلِكِنَا الْمُعْظَمِ، سُلْطَانَ  
سَلَاطُونَ، سُلْطَانَ شَرَفِ الدِّينِ اَدْرِيسِ شَاهِ الْحَاجِ  
ابْنِ الْمَرْحُومِ سُلْطَانَ صَلَاحِ الدِّينِ عَبْدِ الْعَزِيزِ شَاهِ  
الْحَاجِ. اللَّهُمَّ أَدِمِ الْعُونَ وَالْهِدَايَةَ وَالتَّوْفِيقَ،  
وَالصِّحَّةَ وَالسَّلَامَةَ مِنْكَ، لِوَلِيِّ عَهْدِ سَلَاطُونَ، تَعَكُّو  
أَمِيرِ شَاهِ ابْنِ السُّلْطَانَ شَرَفِ الدِّينِ اَدْرِيسِ شَاهِ  
الْحَاجِ، فِي أَمْنٍ وَصَلَاحٍ وَعَافِيَةٍ بِمَنْكَ وَكَرَمِكَ يَا  
ذَالْجَلَالِ وَالْإِكْرَامِ. اللَّهُمَّ أَطِلْ عُمْرَهُمَا مُصْلِحَيْنِ



# لِلْمُوظَّفِينَ وَالرَّعِيَّةِ وَالْبِلَادِ، وَبَلَغْ مَقاصِدَهُمَا لِطَرِيقِ الهُدَى وَالرَّشَادِ.

Ya Allah, Engkaulah Tuhan yang Maha Berkuasa, kami bersyukur kehadiran-Mu yang telah mengurniakan rahmat dan keberkatan kepada negeri ini yang terus sejahtera dan maju, serta rakyatnya bersatu padu, dibawah naungan dan pimpinan raja kami sebagai Ketua Agama Islam di negeri ini.

Justeru kami pohon kehadiran-Mu ya Allah, tetapkanlah iman dan pegangan kami kepada Ahli Sunnah Wal-Jamaah, peliharalah kami daripada ajaran yang terkeluar daripada Islam seperti Qadyani dan ajaran-ajaran yang difatwakan sesat seperti Syiah. Ya Allah, Ya Rahman, Ya Rahim, satukanlah hati-hati kami, kurniakanlah kami rezeki yang luas lagi barakah, kayakanlah kami dengan ilmu yang bermanfaat dan lindungilah kami daripada bala bencana. Ya Allah, kurniakanlah petunjuk kepada kami untuk mendirikan solat fardu lima waktu secara berjemaah, menunaikan zakat melalui Lembaga Zakat Selangor, mewakaf dan menginfakkan harta melalui Perbadanan Wakaf Selangor dan Tabung Amanah Pembangunan Islam Selangor, dan Tabung Amanah Sumbangan Anak Yatim Yayasan Islam Darul Ehsan. Ya allah! Terimalah infaq mereka dan berilah ganjaran yang besar.



رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ وَاجْعَلْنَا  
لِلْمُتَّقِينَ إِمَامًا. رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً  
وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي  
الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ  
لَعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ نِعْمِهِ  
يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ  
أَكْبَرُ وَاللَّهُ يَعْلَمُ مَا تَصْنَعُونَ.

\*\*\*\*\*